

■ UNIVERSITÂT *Font furlans tal mont*

In grazie di une donazion dai furlans emigrâts in Svizre e che a apartegnin al Fogolâr furlan di Gjinevre, la Universitât di Udin e à decidût di meti in pîts, tra lis vôs dal so belanç, il «Font furlans tal mont». Un contribût, chel dai emigrants, fat «a sostegn de universitât, che – al à spiegât Mario



Menossi, soci fondadôr dal Fogolâr furlan di Gjinevre – e sta vivint un moment difil daspò dai tais ai finanziaments che a coventin par fâle funzionâ e par mantignî i livei tocjâts». Ricuardant che il fogolâr sviziar al firmà tal 1965 la petizion pe universitât dal Friûl, cumò, a

trente agns de sô istituzion, «ognidun al à di cjàpâ cussience de serietât dal probleme e dâ alc a pro di une istituzion che ducj a ricognossin la impuartance, la cualitât e lis capacitâts», a àn dit i delegâts dal Fogolâr di Gjinevre a Udin. I fonts, e à sclarît la retore dal ateneu, Cristiana Compagno, a saran destinâts ae mobilitât internazionâl sedi dai students, sedi dai ricercjadôrs, e a saran la risulte des donazions che a rivaran ae universitât sul esempi di chê svizare.